

甌鉢羅室書畫過目攷目錄卷三

通州李玉茶蘊壺編次

劉綸

曹秀先

鄭燮

史震林

圖清格

黃掌綸

項恂

李楡

袁枚

顧鶴慶

戴炳

姜恭壽

凌竹

汪士慎

高翔甲

程兆熊

戴禮

張庚

謝希曾

戴遠

楊汝諧

秉恭

楊法

周尚文

汪葑

陳率祖

朱方霽

勵守謙

錢維城

維喬伯坳

潘奕雋

梁國治

汪承霈

陶之金

周於禮

劉墉

李敬思

秦大士

錢載

世錫善揚善章

翁方綱

顧光旭

梁同書

陸燿 徐良 王祖 王又曾

朱筠珪 周升桓 錢大昕東塾 王大鶴

畢沅瀧 王文治 王宸 王杰

梁巖 張敬迺軒迺 王宜詰 汪穀

畢溥 邢泰 錢坫 陳嵩

潘恭壽岐 董誥 姚鼐 吳霽

陸飛 金德輿 宮國苞 張頊

孔繼涑 陸遵書 劉錫嘏 凌瑚

錢澧 汪體仁 鐵保 毛上臬

余集 秦瀛 吳錫麒 郎際昌

高樹程 馮敏昌 朱龍鑑 殷樹柏

汪中 常世經 查禮 黃震

江介 陸恭 趙懷玉 彭良啟

法式善 關槐 孫銓 曾燠

宋葆瀉 張賜寧 陳銑 丁敬

汪恭 康濤以甯 陳馥 畢涌簡

王學浩張伯鳳 范永祺 瞿中溶 張奎

萬上遴 蔣維勤 孫星衍 馬履泰

何道生 翁樹培 吳文徵 舒位

王芑孫 鄧石如程荃 陳靖 姚鍾德

奚岡趙錦沈 方薰森 阮元 張錦芳

羅聘允續 吳履 瑛寶 錢樹杜東燕詒

鮑廷博 錢楷 伊秉綬念曾 黎簡何琛

蘇廷煜 王元勳 石韞玉 洪亮吉

蔣祥璠

黃鉞

汪梅鼎

邢澍

熊方受

桂馥

張問陶

張寶

金學蓮

程元多

唐英

張道渥

徐椿梅

郊掄達

吳寶書

邵士變士鈐士愷士昆

宋光寶

王維馨

宋霖

徐岡

李世則

朱寬

蔡嘉

朱文嶸昂之

翟大坤繼昌

姜曠

萬承紀

洪承祖

吳修

趙魏

儀克中

馬振

蔣仁

英和

李宗瀚

蔡之定

陳希祖延思字

改琦

姚嗣懋

莫晉

曹惠華

黃丹書

洪範

黃易

王諤

錢泳

惲濬源

張百祿震

江聲

畢紹棠

顧洛駟

夏暈

徐堅

秦儀寶

計楠芬光所

馬士圖

胡桂九思

徐鉞

張鏐

張騏

徐世綱

顧錦疇春福

陳鏞

王馥

袁桐

許敬

陳倬

郭麐驥岱

蔣敬

黃知彰

汪大經

李修易

陳鍾豫

邵聖藝

蔣步瀛

陳鼎

周農

陸愚卿因儀

王霖

余國觀

韋光黻

石渠

惲秉恬

姚之麟

朱堅

馮津

巖寅

闕嵐

包世臣

錢元章

甌鉢羅室書畫過目攷卷三

通州李玉棻蘊壺編輯

劉綸字春涵號繩庵江蘇武進人乾隆丙辰薦鴻博廷試第一授編修官
大學士謚文定著繩庵內外集曾筮巢侍御藏有金牋行楷千文冊骨
肉停勻由魯公兼法承旨

曹秀先字冰持號地山江西新建人乾隆丙辰翰林薦鴻博官禮部尚書
謚文恪工書著賜書堂集家西園主人藏有大楷書冊純寫中鋒力透
紙背

鄭燮字克柔號板橋江蘇興化人乾隆丙辰進士官山東濰縣知縣書法
瘞鶴銘而兼黃魯直合其意為分書通其意寫竹蘭中年間作花木著
板橋詩詞文鈔題畫記吳子復太守藏有絹本竹蘭大屏八幀心泉上
人藏有絹本設色桃樹直幀筆雅色妍題識工整學山谷款署乾隆四

年夏日寫祝師母大人五十千秋又藏有小行書詩冊秀逸動人與偽託者迥別余藏有設色菊花竹籬立幀趙懷玉題七絕一首又行楷大幀晚年兼隸意

史震林字岵岡號悟岡一號匏岡江蘇金壇人乾隆丁巳進士官教諭工樹石竹蘭兼隸書性悅禪詩文近仙佛著西清散記華陽散稿陳詩庭孝廉藏有設色樹石芝草立幀具生秀氣書味盎然余家藏有隸書風雨茆屋匾額

圖清格姓 氏字牧山滿洲正紅旗人官山西大同知府工寫石自闢一徑為鄭燮石交性至孝築丙舍於西山宜春宇少司農藏有菊石立幀高鳳翰題七絕一首左腕書也

黃掌綸字展之號吟川順天大興人詩學樊川書法懷素畫宗關仝世有隱德酷嗜金石著吟川詩鈔林心甫明府藏有設色江山漁艇圖大卷

筆極清刻草書七絕一首時款二行

項宗字岷雲安徽歙縣人工山水家西園主人藏有墨筆溪山煙雨圖大卷在思白長蘅之間

李綸字志良號笏溪江蘇婁縣人工寫照兼長花卉楊古醞明府藏有摹半身杜麗娘絹本立幀手執青梅一枝簪頭蝴蝶栩栩如生真妙手也袁枚字子才號簡齋浙江錢塘人諸生薦鴻博乾隆己未翰林改官江蘇上元知縣乞歸築隨園工詩文著小倉山房集隨園詩話隨筆張子和比部藏有行楷詩冊張問陶伊秉綬跋

顧鶴慶字子餘號發庵江蘇丹徒人客禮親王邸幕山水宗宋元尤長枯竹瘦石擅行草詩文卓蔭方尚書藏有設色仿各家山水大橫冊後葉有汲修主人行楷題七律二首跋識十一行瑛蘭坡中丞藏有幽篁瘦石便面極有丰致心泉上人藏有霜柯圖小卷得元人神髓

戴炳字明章號笠人江蘇吳江人工人物山水花卉張子和比部藏有淡
設色江千秋柳圖卷筆意韶秀

姜恭壽字靜宰號香巖一號東陽外史江蘇如皋人乾隆辛酉舉人工花
木古肆見有淡著色梧桐竹石立幀縱逸多姿

凌竹字南樓號此君晚號平安老人江蘇常熟人工書畫詩詞古肆見有
墨筆花木冊各題七絕一首

汪士慎字近人號巢林又號溪東外史安徽歙縣人僑寓揚州私淑金農
遂相友善工隸書梅蘭花木著巢林集程仲立太守藏有雙鉤竹蘭立
幀雅韻欲流短句題識亦頗古逸景劍泉閣學藏有墨梅長卷行書七
絕四首余藏有設色梅花大幀密萼繁枝饒有荒寒氣象又隸書高寒

草堂匾額

高翔字鳳岡號樾堂又號西堂一號西堂江蘇甘泉人山水得石濤漸江

之縱恣篆刻追程穆倩梅竹逼金冬心書有別趣家西園主人藏有設
色平山堂全景冊畫意題識均奇致古雅曾筮巢侍御藏有設色紅綠
梅花小卷枝萼不多俗手莫及子甲字翰亭工隸書花鳥古肆見有墨
筆松枝立幀亦秀色可餐

程兆熊字夢飛號小迂香南楓泉澹泉壽泉皆別號也江蘇儀徵人詩書
畫時稱三絕余藏有行楷七律立幀直逼汪士鋹張仰山處士藏有梅
花凍雀立幀與新羅吻合

戴禮字說周號石屏江蘇興化人陳撰弟子私淑李鱣王朶園觀察藏有
設色松樹藤花大幀儼與慎道人共語也

張庚原名燾字溥三又字溥山號瓜田一號彌伽居士白苧村桑者浙江
秀水人薦鴻博工書畫精鑑定著畫徵錄南山論畫強恕齋集王竹吾
司馬藏有花鳥山水竹石小冊十葉家芝階太守藏有山水花木大冊

余藏有墨筆仿富春山圖長卷約兩丈許略形草率時款乾隆六年辛酉五十七歲作堪喜齋舊藏又墨筆仿曹雲西石瀨雙松圖立幀會萃衆有得力鑑賞之功焉古肆見有仿雲林墨山水立幀寥寥數筆愈見高逸

謝希曾字孝基號安山江蘇吳縣人諸生工小楷山水精鑑賞以所藏名蹟摹泐禊蘭堂法帖著易學指南瑛蘭坡中丞藏有墨山水便面與香光相契合

戴遠字士宏號毅齋安徽歙縣人工人物花卉劉統勳薦辦南巡盛典圖古肆見有奉勅畫人物小畫冊八葉極工麗

楊汝諧字端揆號柳汀一號退谷江蘇華亭人官通判家富收藏書宗米董通音律精篆刻著崇雅堂叢書楊古醜明府藏有行楷大屏六幀硬穎麗賤波磔得神從子秉恭字葵誠號孝泉工畫士女私淑老蓮未獲

觀馬

楊法字已軍江蘇興化人工篆隸精攷證金石碑版張仰山處士藏有小行書詩卷濮雲衣中翰藏有草隸冊書古詩十九首款署乾隆十年歲次乙丑五月十有六日書於漢上式訓堂

周尚文字素堅號石湖江蘇吳縣人順昌五世孫山水法大癡 翠華臨幸江南與繪江南名勝圖深蒙睿賞胡月波上舍藏有淡著色秋景山水大幀作年七十三歲淹潤不枯

汪葑字芥亭號玉書江蘇吳縣人工山水上遡宋元諸家潘紱庭京卿藏有墨山水大卷蒼勁有力

陳率祖字怡庭號摩崖山人湖南祁陽人官江蘇金山知縣工山水花卉段培元都轉藏有墨山水大幀煙雨迷離奇情勃發

朱方霽字吉人號春橋江蘇昭文人曾進花卉冊於南巡行在山水亦文

質相宜晚歲寫梅趙寶齋銓部藏有墨梅立幀閒冷幽雋頗得荒寒氣
味惜絹本過污以其畫所見僅此

勵守謙字自牧號雙清老人宗萬子乾隆乙丑翰林花鳥得家傳余藏有
設色松樹杏花松鴨紙本大幀時款甲寅夏日松坪

錢維城字宗磐一字幼安號幼庵一號稼軒又號茶山江蘇武進人乾隆
乙丑狀元官刑部尚書謚文敏工山水供奉內廷為畫苑領袖著茶山
集古肆見有奉勅畫通州大通橋運河圖兩卷長皆八尺有高廟御覽
之璽沉雄古厚生氣勃然非拘於圖樣者張湛如水部藏有墨山水冊
昔為其甥作未及書款竟成絕筆後葉有張洽並其弟維喬跋識始末
老筆紛披蒼古渾化曾筮巢侍御藏有仿趙大年春柳大幀極似耕煙
有高廟御題七絕二首家西園主人藏有蓺蘭蒔菊圖大卷筆雅色妍
行書時款三行亦小照之屬弟維喬字樹參一字季木號曙川又號竹

初乾隆壬午舉人官浙江鄞縣知縣工山水著竹初稿心泉上人藏有
設色山水絹本卷頗類唐寅瑛蘭坡中丞藏有仿思翁墨山水便面從
子伯垌字魯思一字魯斯號野予又號樵陂工書善古文精攷證著竹
初庵集余家藏有行書前出師表冊意兼蘇米款署臨李北海本豐山
大兄

潘奕雋字榕臯號水雲漫士晚號三松老人江蘇吳縣人乾隆乙丑進士
官戶部主事與瓊林宴疊晉四品京堂工花卉篆隸張子和比部藏有
墨花卉小冊溫公跋為紱庭京卿所贈

梁國治字階平一字豐山號瑤峯順天通州人乾隆戊辰狀元改歸浙江
會稽原籍官大學士謚文定工書著敬思堂集梁九齋司訓藏有行楷
前出師表冊筆意豐腴當時館閣書也

汪承霈字春農一字受時號時齋又號蕉雪菊叟由敦孫乾隆丁卯舉人

官兵部尚書工書畫指墨供奉內廷著時晴齋集余藏有設色歲朝圖立幀朱子衡太史藏有指墨耄耋圖大幀曾筮巢侍御藏有仿宋院本杜鵑花大幀以硃砂寫花石青綠寫葉赭墨寫枝幹萬葉千花盡用濃色之妙

陶之金字載嶽號東園浙江嘉善人梁同書稱其書直接張照工寫花竹家西園主人藏有小行楷詩冊深得魯公坡公法非專學天瓶也周以斫小楷跋七行

周於禮字立崖號亦園雲南嶧峨人乾隆辛未翰林官大理寺少卿書法襄陽著敦彝堂集卓友蓮太守藏有臨米札大橫幅長丈許高四尺許字幾徑尺極雄偉狀余藏有小行書長卷

劉墉字崇如號木庵更號石庵又號青原香巖勗齋日觀峰道人統勳子乾隆辛未翰林官大學士謚文清書法鍾王淵源承旨出自庭訓晚詣

坡公化肉為骨刻清愛堂曙海樓文清手蹟諸帖卓岷原比部藏有百餘通尺牘冊內多家書三十年竹報彙萃亦頗難得比部乃文清孫燕庭方伯女夫是冊出自嫁箱者曾筮巢侍御藏有小行楷詠花詩冊橫直相安醞釀無迹款署定圃尚書母舅范星甫太守藏有其曾祖攝生款行書冊兩本後葉瑛寶跋識阜蔭方尚藏有摘臨各家帖長卷凡十一段書於海定直廬石瑤田刺史藏有行楷粉牋大屏六幀時款嘉慶丁巳春日為暮年所作余藏有小楷臨頭陀寺碑小卷有阮元眼福印又牋紙臨褚遂良書行楷大幀款署濯之

李敬思字紉齋江蘇吳江人工山水供奉內廷官廣東新會巡檢王輔臣少尉藏有羅浮山全圖冊畫僅半葉以硃筆標題山寺名目筆意頗渾厚近山樵法

秦大士字魯一號澗泉又號秋田江蘇上元人乾隆壬申狀元官侍讀學

士工花卉書兼歐柳家西園主人藏有墨萱花立幀

錢載字坤一號箴石又號匏尊晚號萬松居士浙江秀水人薦鴻博再舉經學乾隆壬申傳臚官禮部侍郎工花木蘭竹得南樓老人傳以水墨名家著箴石齋集延旭堂員外家芝階太守家西園主人皆藏有墨筆花木大冊余藏有墨筆玉蘭大幀簡淡古雅不假雕飾心泉上人藏有墨蘭石大橫幅作年八十歲子世錫字慈伯號百泉戊戌翰林授檢討工書著麋山野屋集曾筌巢侍御藏有金臺懷古七律八首卷孫善揚守慎夫號麋山善章字文江均見有墨蘭竹便面僅守家法亦楚楚有致

翁方綱字正三又字忠叙號覃溪一號蘇齋順天大興人乾隆壬申翰士官內閣學士書法永興工篆隸精攷證金石著復初齋全集歷代名人年譜平生鈎勒碑版甚夥凡翁刻者皆精陳詩庭孝廉藏有臨化度寺

碑冊款署癸巳冬日摹第二十一通家西園主人藏有真草篆隸鐘鼎文字冊實精絕罕作之品又隸書遊潭柘寺和韻七律大橫幅書年八十三歲余藏有臨香光虞書小楷冊仍是永興凝重意書於山左試院又次曹儷笙太傅詩韻行楷寬橫幅又春江花月圖小照題詩橫幅款署春潭云云古肆見有隸書王昶墓表銘大幅尚未裝池也

顧光旭字晴沙號華陽山人江蘇無錫人乾隆壬申進士官甘肅涼莊道工書著梁溪詩鈔響泉集陳靖皆孝廉藏有金粟牋小行楷詩冊款署芳谷先生和正意兼米董具遒勁姿

梁同書字元穎號山舟晚號不翁九十外號新吾長翁詩正于乾隆壬申賜進士官侍講與鹿鳴宴晉學士書由顏柳兼宗米董著頻羅庵集陳銑為刻辦香樓帖吳修為刻青霞館帖當時墓志多其手書吳子復太守藏有三行行楷連文屏八幀余藏有種竹栽花詩行書長卷作年九

十歲而一氣完固足徵壽相又行書七行大幀筆意凝鍊款署雲樵凡書皆貴腴潤獨公書以寫澁紙生硬為佳耳

陸燿字朗甫一字朗夫號青來江蘇吳縣人乾隆壬申舉人官河南巡撫工書畫著切問齋集朗甫詩編運河備覽古肆見有墨山水冊十六葉極有氣韻無款識有印章附葉黃易跋識

徐良字鄰哉號間存一號又次江蘇華亭人乾隆壬申舉人官四川夔州知府書法思翁王蓮西通副藏有寫佛遺教經小楷冊

王祖字德甫一字琴德號蘭泉晚號述庵江蘇青浦人乾隆甲戌翰林官刑部侍郎有江湖七子之目工詩嗜金石選湖海樓詩傳今詞綜著金石粹編春融堂集張子和比部藏有寄翁覃溪詰辨碑版行書長札小卷

王又曾字受銘號穀原浙江秀水人乾隆甲戌進士官刑部主事與錢載

以詩名有錢王之目工書著丁辛老屋集古肆見有行書詩牋五通合

冊九葉

朱筠字竹君又字美叔號笥河順天大興人乾隆甲戌翰林官學士博聞宏覽工篆隸著笥河集范雲初參軍藏有五行篆書大幀弟珪字石君號南厓晚號盤陀老人戊辰翰林官大學士晉太傅謚文正工隸書著知足齋集二公皆精金石之學家西園主人藏有二公行楷尺牘十四通合冊

周升桓字穉圭號山茨浙江嘉善人乾隆甲戌進士官廣西巡撫書法蘇米著皖遊草家西園主人藏有蠅頭行書詩卷得小米風味陳鶴舟明府藏有虎皮牋行楷千文冊用吳興法無印章

錢大昕字曉徵又字及之號竹汀一號辛楣江蘇嘉定人乾隆甲戌翰林官詹事通六書百家工篆隸著潛學堂集金石文字目錄竹汀日記父

子兄弟均精攷證有九錢之目楊古醞明府藏有五行篆書大幀景劍
 泉閣學藏有三行隸書屏四幀極古穆趨子東塾字學仲又字學韓號
 膠田又號石橋晚號石丈歲貢生官吳縣教諭書畫篆隸紹家法著石
 橋存稿偶寫山水蕭寥荒冷中伯權觀察藏有四行篆書大幀時款一
 行

王大鶴字露仲號嘯笠順天通州人乾隆丁丑翰林官少詹事侍仁聖並
 成哲親王讀因避權貴引疾歸里翠華東巡兩臨其家趣之起以母老
 辭書法襄陽兼吳興著嘯笠山房詩露仲詩文集余家藏有臨米禮部
 五律詩大幀先曾祖自東公款又行楷大冊粉牋濃墨略有脫落世傳
 公書罕彌加珍重曾勸其曾孫少仙處士鈞勒上石藉以闡幽表德俾
 後人知其善書虛懷罕作至今少仙已歸道山家勢日微良可惋也
 畢沅字纒衡號秋颿江蘇鎮洋人乾隆庚辰狀元官湖廣總督工書輯河

間書畫錄兩浙金石志著靈巖山人集刻經訓堂法帖家西園主人藏
 有行楷尺牘五通詩牋三幅合冊弟瀧字澗飛號竹癡授郎中不仕精
 鑑賞所藏皆真蹟烜赫者山水師曹雲西余藏有墨山水小幀筆簡意
 清眼高手健與古有會也

王文治字禹卿號夢樓江蘇丹徒人乾隆庚辰探花官雲南臨安知府書
 法張樗寮兼思翁並擅摹各家著夢樓詩柿葉山房集景劍泉閣學藏
 有臨晉唐宋明各家行楷冊四十葉未識已酉秋日夜雨送竹香入牖
 晨起階立苔痕印碧梧葉點黃爽氣沁人心脾拂紙南牕摘臨各種法
 帖書寄秋帆制府同年誨政丹徒某頓首瑛蘭坡中丞藏有行書詠雞
 冠秋葵盆蘭四季桂七律四首詠菊七絕八首長卷陳鶴舟明府藏有
 臨韭花帖大幀款署蛟門余藏有行楷大橫幅書冬日過筠亭署齋遇
 雪並雪後懷伊霄山員外詩又行書題畫詩三首立幀款署墨香居士

王宸字紫凝號蓬心晚號蒙叟一號蓮柳居士玉虎山樵蓬樵老瀟湘翁
退官衲子原祁曾孫乾隆庚辰舉人官湖南永州知府畫變家法仍宗
子久著繪林伐材與王昱王愔王玖稱小四王李梅卿比部藏有墨筆
仿元人山水立幀時款己酉秋八月王文治三題跋家西園主人藏有
寫倪迂詞句墨山水卷何仲博農部藏有臨沈啟南槐雨亭圖立幀余
藏有墨筆瀟湘煙雨圖長卷純用禿皴王文治題首並題七律四首於
尾款署湛庵廉使又墨筆仿王孟端山水卷沉渾生辣筆有鋒稜極精
作也

王杰字偉人號惺園陝西韓城人乾隆辛巳狀元官大學士謚文端書法
承旨工小楷家西園主人藏有絹本行楷大屏四幀有仙佛氣具富貴
姿

梁巖字聞山號松齋安徽亳州人乾隆壬午舉人官四川巴東知縣書宗

徐季海晚法董香光與詩正國治同書時稱四梁又與同書曰南北梁
與孔繼涑稱南梁北孔余藏有寸楷臨圭峰碑冊又行書四行大屏十
二幀家西園主人藏有小行楷冊得思翁吞吐之妙南梁所未逮也

張敬字虎人又字雪鴻號芷園一號芷沅又號木者晚號止止道人安徽
桐城人占籍山東歷城乾隆壬午舉人官湖北天門知縣工山水人物
花木鳥獸兼水墨左腕指頭白描李梅卿比部藏有墨筆花木大屏六
幀倪小舫署正藏有墨荷大幀極為精雅子廸軒字虎觀工寫蘭見有
墨蘭小幀從子廸耆字白眉號壽民工花鳥李梅卿比部藏有設色花
鳥大冊二十四葉弟子馮澍字蔬香歷城人增芝田觀簪藏有墨筆盆
花立幀

王宜字嶰谷王宸族弟官江西新建知縣山水與兄競美古肆見有設色
山水大幀派出司農似形散漫從弟詰字摩也號鷗白山水本家法著

雪浪軒詩阜蔭方尚書藏有墨山水小冊十葉

汪穀字心農號琴田安徽休甯人工書畫精鑑定王文治重其書為勒帖
瑛蘭坡中丞藏有臨韭花帖便面用筆沉着又墨蘭石便面亦極瀟灑
心泉上人藏有行書五行短屏四幀意在宋四家之間無輕佻邪賴之
習宜乎夢樓重之也

畢溥字逢原號竹濤畢沅從弟廩貢生書宗兩文敏王治評其書文如簪
花美女丰致絕倫陳葆珊觀察藏有行書詠古詩冊秀媚動人真有不
勝羅綺之勢李聯琇跋七行

邢泰字遇清號香光江蘇太倉人貢生精繪事師王昱花卉宗白陽善題
詠有仿元遺山論詩作論畫詩五十首自唐人至清初名家無不中肯
堪與宋牧仲朱竹垞論畫之作並傳瑛蘭坡中丞藏有淡著色山水便
面實得婁東三昧

錢坫字獻之號十蘭大昕從子官陝西乾州州判精攷金石碑版工篆籀
孫星衍推為第一作手晚用左腕多署名泉坫著九經借字攷說文辭
詮錢氏四種景劍泉閣學藏有三行篆書屏十二幀大塊文章殊未易
求也

陳嵩字肖生江蘇如臯人官內閣典籍花卉摹北宋尤工寫梅心泉上人
藏有設色梅花短卷張問陶題七絕一首時款二行

潘恭壽字慎夫號蓮巢江蘇丹徒人王宸以宿雨初收曉煙未泮八字真
言授之故畫多含詩意兼工人物花木竹蘭與王文治友善故畫多其
題著龜山精舍集曾筌巢侍御藏有設色花木大冊景劍泉閣學藏有
設色仿戴文進靈谷春雲圖卷丁叔衡太史藏有墨竹蘭冊八葉皆有
王題余藏有荷花雙鳥直幀夢樓題煙光自潤非關雨水藻俱馨不獨
花另行楷長跋一方又仿錢叔寶松柏同春圖直幀時款已酉仲冬幅

內鈎寫萱花古雅皆千硯百鍊直逼石田又何重乎王題也子岐字荇池號小蓮世其業袁子文上舍藏有花卉立幀傳色明治善守家風

董誥字西京號蔗林一號柘林邦達子乾隆癸未傳臚官大學士謚文恭畫本庭訓晚宗宋元供奉清廷景劍泉閣學藏有奉勅畫設色山水小冊每葉後半幅仁廟對題七絕一首純仿倪黃室人駢蘭閣藏有設色傳硯圖小橫幅筆意高華出自嫁箱者後為張子和比部索歸完其手澤也

姚燮字姬傳號夢穀一號息抱安徽桐城人乾隆癸未進士官禮部郎中與鹿鳴宴晉四品卿工行楷篆隸擅古文精攷證著惜抱軒集余家藏有行書短屏四幀叔祖特夫公款張子和比部藏有行楷尺牘冊計十五通姚椿跋半葉

吳霽字倬雲號竹堂浙江錢塘人乾隆癸未進士淡榮利精著作書畫並妙著晚翠樓集曾筮巢侍御藏有淡著色竹深荷淨圖短卷筆雅意超使新羅復生亦當把臂入林

陸飛字起潛號筱飲浙江仁和人乾隆乙酉解元山水花卉均法天池工詩詞題詠著筱飲集余藏有墨筆菊籬大幀行書長題飄逸出羣

金德輿字雲莊一字鄂巖號鶴年浙江桐鄉人官刑部主事工書精鑑著桐華館詩鈔家伯雨駕部藏有尺牘詩牋合冊九葉

宮國苞字霜橋江蘇泰州人工蘭卉英廉推重之余藏有墨蘭立幀其後人子行明府名本昂為山左牧今近代收藏家也耳其名者廿餘年余亦曾往山左惜未覲面而得縱觀其所藏

張墳字商言號瘦銅江蘇吳縣人乾隆乙酉舉人官中書工詩翰著竹葉庵集潘鄭庵尚書藏有小行書苔牋詩幀

孔繼涑字信夫號葭谷一號谷園又號雲廬子衍聖公傳鐸子山東曲阜

人乾隆戊子舉人官中書工書得張照傳以酷肖時稱小司寇精鑑賞摹刻名人法帖摹古帖玉煙堂帖玉虹鑑真玉虹樓帖集張文敏公書為孔氏百一帖吳子復太守藏有金粟牋臨天馬賦卷直逼文敏心泉上人藏有臨米詩絹本冊十六葉尤覺凝鍊古肆見有小楷雜詩冊中年從承旨法

陸遵書字即仙一字扶遠號美苑江蘇嘉定人乾隆戊子舉人官廣東會同知縣工山水梅竹供奉清廷曾與張鵬翀抗行畫苑心泉上人藏有墨筆細皴寒山圖大幀儼似一幅廉州也古肆見有墨筆寒林夕照圖紙本卷款署癸卯冬日二行

劉錫嘏字純齋號拙存順天通州人乾隆己丑翰林官江蘇淮徐道書由唐人兼宋四家寫梅師天瓶著十硯齋集余家藏有臨各家屏十二幀包涵衆有運動自如叔祖梅坡公款公即觀察姪壻也又行書詩冊略

兼董法又設色梅花大幀行書七律一首贈其後人竹颿別駕矣梁九齋司訓藏有墨梅大幀行書七絕三首劉墉行書次韻左方

凌湖字仲華號香泉江蘇如皋人士女花鳥法北宋時以梁同書行楷錢維喬山水湖之寫生為三絕比戶藏之許樸齋太守藏有設色花鳥絹屏四幀風致嫵媚妍雅悅目景劍泉閣學藏有二喬圖紙本立幀周蒼生太史藏有摘蘭士女立幀汪穀行書七絕二首識語二行古肆見有淡著色山水絹本立幀款署立之惜筆墨簡而帶霉痕祇取真蹟耳

錢澧字東注號南園雲南昆明人乾隆辛卯翰林官通政司副使直諒敢言書兼誠懸平原工畫馬擅古文著南園集家西園主人藏有楷書壽詩大屏六幀用柳法而秀勁周苻農少司農藏有行書五行絹屏四幀多從顏法又墨鈎雙馬立幀幅左題識五行邊左何紹基跋有漢陽葉氏平安館收藏兩印

汪體仁字景瑤號石瓠江蘇吳縣人乾隆辛卯舉人工山水著佐觴草陳
昔凡刺史藏有設色山水便面為婁東深厚一派

鐵保姓棟鄂氏字冶亭一字鐵卿號梅庵滿洲正黃旗人乾隆壬辰翰林
官兩江總督書法晉唐著梅庵詩鈔刻惟清齋帖卓友蓮太守藏有臨
書譜全文冊款署臨於邗江節署寄閩峰弟一一點定齊仲崖觀察藏
有臨各家行草大冊為極暮年作余藏有行書五行大幀時款丁卯九
月一日青軒中丞有仙隱庵看桂花之遊云云又楷書撒手懸崖四大
字便面名款二行

毛上矣字羅照號宿亭江蘇鎮洋人乾隆壬辰進士官戶部主事山水私
淑司農供奉清廷一時稱旨臨摹古蹟甚夥趙梅庵明府藏有墨筆仿
巨師匡廬清曉圖大卷奇矯深秀瑛蘭坡中丞藏有設色仿唐解元匡
廬圖便面亦極秀冶

余集字蓉裳號秋室浙江仁和人乾隆壬辰翰林官侍講學士與鹿鳴宴
晉三品卿工山水花卉尤精士女有余美人之目著秋室集許樸齋太
守藏有墨筆花卉小冊筆趣妙逸不染纖塵又日暮倚修竹圖士女立
幀余藏有絹本寫落花人獨立微雨燕雙飛詞句士女立幀極靜妙
趣

秦瀛字凌滄一字小峴號遂庵江蘇無錫人乾隆甲午舉人官刑部侍郎
工書著小峴山人集宛大山明府藏有小行楷錄姜白石詞卷款署芳
谷先生有思翁意

吳錫麒字聖徵號穀人浙江錢唐人乾隆乙未翰林官祭酒工書擅詩賦
駢體文著有正味齋全集余藏有先曾祖自東公欵行楷五律詩橫
幅又寄石士先生題山水障子行楷七古直幀較詒晉齋書筆力少遜
風味似勝之

郎際昌字廷贊號芝田江蘇崑山人王三錫弟子庠生工山水與王學浩
齊名王竹吾中翰藏有鶴澗烹茶圖殘冊一葉增芝田觀簪藏有法淺
絳山水立幀專用渴筆

高樹程字邁庵一字斬玉號煙霞子浙江錢塘人乾隆丁酉副貢生工山
水花卉書法趙董瑛蘭坡中丞藏有設色海棠便面

馮敏昌字伯求號魚山廣東欽州人乾隆戊戌翰林改戶部主事書法二
王善寫松竹蘭卉著河陽金石錄文章心印小羅浮草堂諸集文春園
直刺藏有大行楷大橫幅何伯瑜處士藏有小行書梓人傳卷近瘞鶴
銘法

朱龍鑑字又雲號蒙溪江蘇崑山人官安徽通判尹繼善幕客曾為其作
攝山勝引圖大卷見於古肆中雅潔蕭疏筆墨兼盡卷尾名人題詠如
張問陶等甚夥以名品爭購未悉所歸

殷樹柏字曼卿號雲樓一號懶雲浙江嘉興人花卉宗項氏工詞翰著一
多廬詩鈔廣紹彭大司馬藏有淡著色花卉小冊天真古雅有風人之
旨

汪中字容夫江蘇江都人乾隆丁酉拔貢生精六書說文金石晚年專治
經術著述學內外篇廣陵通典金陵地理攷春秋後傳知新記周佑之
農部藏有摹鐘鼎彝器文小冊八葉

常世經字九一又字豫九號孤峰逸老順天通州人書畫宗南宮工詩精
醫子孫多紹之王少仙處士藏有墨山水立幀渲染渾淪鄉耆手蹟自
宜存之余亦願傳其人耳

查禮字儉堂一字恂叔號榕巢順天宛平人官湖南巡撫工山水花木家
鐵梅中丞藏有墨花卉卷雅逸有法中丞小楷跋十一行許乃普跋六
行

黃震字振宇號竹廬江蘇太倉人畢沅幕客工山水潘蓮舫光祿藏有設色金焦圖大卷略近墨井畢沅行書題七古於尾

江介原名鑑字石如浙江錢塘人花木書法皆近南田梁同書推重之程仲立太守藏有設色歲朝圖長幀賦色妍雅

陸恭字孟莊號謹庭江蘇吳縣人王文治女夫乾隆舉人工書善畫嗜古精鑑尤喜搜羅名人尺牘潘紱庭京卿藏有墨花卉小卷筆意古雅眼高手辣蓋由胸次橫有名蹟也

趙懷玉字億孫號味辛晚號收庵江蘇武進人乾隆庚子召試舉人官山東兗州同知工詩書法坡公與同里孫淵如洪禔存黃仲則並稱孫洪黃趙著亦有生齋集余藏有行楷前赤壁賦牋冊時款雲山嘉慶元年四月云云

彭良敞字研山號硯珊江西南昌人官長蘆鹽運使工山水陳同叔比部

藏有設色山水屏四幀略近司農款署雪香

法式善姓伍堯氏原名運昌字開文號時帆一號梧門蒙古正紅旗人乾隆庚子翰林官祭酒書法承旨工詩著素存堂稿槐廳筆記延樹南尚書藏有詩龕圖大卷無畫家姓氏筆意似羅聘卷尾有其自題行楷詩龕圖記二十八行曾有錄文今亦遺失張問陶等十四詩跋

關槐字晉卿號曙笙一號柱生浙江仁和人董誥弟子乾隆庚子傳臚官內閣學士工山水詞翰供奉清廷余家藏有 先祖母吳太夫人六十壽屏皆集一時名手有學士青綠山水一幀

孫銓字鑑堂號小迂一號小遷江蘇崑山人乾隆庚子舉人官南匯教諭山水宗大癡花卉師白陽精鑑定刻壽石齋集帖心泉上人藏有設色花卉墨筆山水合冊均極雅潔

曾煥字庶蕃號賓谷江西南城人乾隆辛丑翰林官貴州巡撫工書尤長

古文著賞雨茅屋集曾見公詰嗣笙巢侍御藏有行楷詩冊二十葉皆錄舊作筆意兼率更華亭道勁可愛余曾借觀鈐有鑑定印章相傳公書多王文治代筆心泉上人藏有楷書五言壽詩粉頰冊展頁可定為夢樓所書真鑑家自能別之

宋葆淳字帥初號芝山又號陔陬山西安邑人乾隆癸卯舉人官解州學正工山水花鳥濮南如明府藏有寒林鍾馗圖立幀楊少初太守藏有寫紅了櫻桃綠了芭蕉詞句立幀古肆見有天寒有鶴守梅花圖長幀金士松劉墉董誥金甡鐵保等上下邊隙題跋甚夥余藏有墨山水便面用焦墨稜角森然又墨山水直幀用宋人法近石谷款署約齋邊隙方廷瑚跋六行

張賜甯字坤一號桂巖直隸滄州人官河工州同工山水花木與高鳳翰張啟異曲同工堪稱鼎峙余藏有設色山水長幀多用焦墨意近唐寅

款署城東十四第家鐵梅中丞藏有設色花木大冊摹白陽乃晚年蒼勁作也

陳銑字蓮汀浙江秀水人梁同書弟子工書畫精鑑賞刻瓣香樓梁帖瑛蘭坡中丞藏有書畫便面各一葉余藏有仿丁南羽設色柏樹梅花橫幅時款己未夏五月七十七歲入神邁古有金石氣俗眼弗能鑑也
丁敬字鈍丁號敬身又號龍泓山人江浙錢塘人嗜金石工篆隸書畫鐫刻詩詞著龍泓山館集武林金石錄硯林詩錄程容伯光彖藏有小行楷詩幀極古逸趣瑛蘭坡中丞藏有墨鈎水仙蘭竹便面饒有仙致隸書六言詩題左頗趣

汪恭字恭壽號竹坪安徽休甯人工書摹山舟夢樓兩家皆能酷肖畫仿文氏幾並肩肘偶寫人物花鳥亦佳曾笙巢侍御藏有仿文五峰設色山水立幀又桃花山鳥立幀均臻妍秀

康濤字石舟一字康山號既濟生天篤老人茅心老人蓮蕊峰頭不朽人
浙江仁和人工山水士女許樸齋太守藏有垂釣圖士女立幀又橫塘
夜泛圖士女大幀趙次珊廉訪藏有墨山水小冊八葉對幅書行草隸
篆子以甯字靜之紹其法增芝田觀察藏有五嬰圖立幀畫嬉笑趣
陳馥字里門號春渠浙江錢塘人工隸書張仰山處士藏有臨衡方碑五
行大幀款識一行有古秀氣

畢涵字有涵一字止庵號焦麓又號萊竹居士江蘇陽湖人工山水掃去
塵熟遠宗古法余家藏有墨山水紙本大幀清曠蒼古多用焦墨子簡
字仲白陳鴻壽幕客互相師友古肆見有墨筆仿衡山立幀作年八十
歲

王學浩字孟養號椒畦江蘇崑山人李豫德弟子乾隆丙午舉人官教諭
工山水時為吳淞作手著南山論畫學圍詩鈔家西園主人藏有青綠

仿大癡晴嵐暖翠圖大卷張湛如水部藏有設色山水花卉兩冊極為
生辣古肆見有設色載書圖短卷潘奕雋題首梁章鉅顧莼林則徐行
楷三跋為梁公子授讀時所畫亦晚年筆也弟子張伯鳳字譜梅吳縣
人椒畦酬世作多其手代兼工花木章若洲庶常藏有設色山水卷仿
倪黃極工整

范永祺字鳳頤號莪亭浙江鄞縣人天一閣後裔乾隆丙午舉人工篆隸
鐫刻精收尺牘心泉上人藏有隸書大橫幅

瞿中溶字長生號木天同邑錢大昕女夫官湖南理問精攷證收藏工花
木著湖南金石志曾筮巢侍御藏有墨荷花立幀一花一葉專寫性靈
家西園主人藏有行書尺牘三通

張奎字寶崖號夕庵江蘇丹徒人自坤子潘恭壽弟子貢生工山水花木
著飲淥草堂集心泉上人藏有設色林汀遠渚圖卷幽淡蕭寥瀟漫無

際王少盧司馬藏有仿襄陽青山白雲圖直幀行書長題涂芷衡明府藏有蒼松翠竹大橫幅儼似唐伯虎款署雲芝先生古肆見有仿盛子昭設色山居清夏圖大幀家芝階太守藏有江閣懷人圖寬幀設色法鷗波時款壬午秋八月

萬上遶字輞岡江西南昌人山水宗迂老書法近思翁寫梅為童鈺繼起陳葆珊觀察藏有墨山水大卷石廓峻嶒樹木夭矯兼北宛處居多張今坡觀察藏有墨梅大幀亦頗老健

蔣維勤字敏修號拈華江蘇長洲人官廣西同知工山水著丹青雜志孫小山分轉藏有墨山水立幀焦墨極醒

孫星衍字伯淵一字淵如號季述江蘇陽湖人乾隆丁未探花官山東布政使研究金石碑版工篆隸著金石萃編芳茂山人詩錄韓芸孫署正藏其祖芸昉中丞款三行篆書屏四幀杭芷舸明府藏有篆書王節母

汪孺人墓誌冊十七頁字徑寸許

馬履泰字叔安號秋藥浙江錢塘人乾隆丁未進士官太常寺卿工詩畫古肆見有設色菖蒲怪石立幀題七絕一首雅似金農

何道生字立之號蘭士山西靈石人乾隆丁未翰林官江西九江知府工山水竹蘭著方雪齋集韓芸孫署正藏有墨山水小卷兼思白長蘅竹蘭則酬世之作所見未能備記

翁樹培字宜泉方綱子乾隆丁未翰林官刑部郎中工篆隸尤擅摹鐘鼎文字嗜金石著宜泉錄心泉上人藏有摹寫商周彝器文字立幀朱次卿司訓藏有隸書四行屏六幀

吳文徵字南薌安徽歙縣人官山東同知以書畫名公卿孫星衍歷境繪圖多出其手吳澧緣太守藏有墨筆鵲華秋色圖卷經營位置兼南北兩宗行書七絕二首孫星衍金學蓮趙懷玉各步韻於後伊秉綬行書

跋五行桂馥隸書鵲華秋色圖於首吳存義黃鈺各觀款並傳其中年擅寫生得白石白陽之風焉

舒位字立人號鐵雲順天大興人乾隆戊申舉人工花卉山水著瓶水齋集李石坪衛戎藏有墨花卉屏四幀有天池奇氣

王芑孫字念澧一字漚波號惕甫一號鐵夫又號雲房江蘇長洲人乾隆戊申召試舉人薦鴻博官華亭教諭書逼劉文清蓋不期而合非專學劉書也著碑版廣例楞伽山房淵雅堂集余藏有行楷雜花詩冊書年七十歲何子璋明府藏其祖款行楷詩冊款署蘭卮二兄同年以此冊屬書舊句案頭適有少作一本隨意書之雖故我非今猶願知我者有以教之也乾隆辛亥十月云云古肆見有書札冊三十葉多中年腴潤筆

鄧石如初名避諱以字行更字頑伯號完白一號笈遊道人龍山樵長鳳

水漁長安徽懷甯人以布衣終工書精篆隸鐫刻時稱鄧派劉墉最傾服延入京師遂訂交焉詔晉齋謂近時書家止二人一山左宰相一皖南布衣其傾倒賢王可知矣家西園主人藏有三行篆書立幀張仰山處士藏有行書界朱絲大幀如天馬行空水到渠成自曾文正公國藩重之廣為搜羅聲價愈增而贗鼎層出矣弟子程荃字蘅衫同邑人篆刻紹其傳著篆隱園集心泉上人藏有四行篆書屏六幀

陳靖字青立直隸天津人王宸弟子親承指授善摹子久王蓮西通副藏有設色仿梅道人幀大幀氣骨渾樸彌深彌遠陳秋帆侍御藏有仿廉州墨筆萬山雲起圖大幀細皴重點極為空靈

姚鍾德字春帆江蘇常熟人王宸弟子畫得其傳家西園主人藏有墨山水長卷用筆沉著張澤仁行書跋五行

奚岡字純章號鐵生一號蝶野子蒙泉外史散木居士鶴渚生浙江錢塘

人書法褚登善工山水花木篆隸詩詞著冬花菴燼餘稿余藏有臨各家山水小冊高僅四寸蒼勁高古洗滌纖妍李梅卿比部藏有墨筆五松圖大幀家西園主人藏有設色仿惠崇采菱圖小卷風格高華的是南田後身譚誦甫刺史藏有春景士女直幀題滿江紅一闕心泉上人藏有墨筆仿江貫道山水大幀款署山川出雲為天下雨港庵廉使將入覲寫此頌之弟子趙錦字寄漚沈唐字蓮舟均同邑人筆墨謹飭古肆各見有山水便面似少摹古功夫皆款署見亭河帥

方薰字蘭士又字蘭坻號蘭生又號樗菴一號鬻兒鄉農晚號懶儒浙江石門人與奚岡並名山水花木矩矱俱精高廟南巡進太平歡樂圖說深蒙嘉獎工詩著山靜居論畫家西園主人藏有仿王晉卿設色山水卷朱子涵觀察藏有設色花木短屏八幀極饒妍麗余藏有芭蕉竹石大幀兼新羅南田意其父孫字遜一號雪屏一號抱璞山人本寫生家

也

阮元字伯元號芸臺又號雷塘庵主晚號頤性老人江蘇儀徵人乾隆己酉翰林官大學士晉太傅諡文達工隸書精攷證善製大理石屏為阮氏石畫號蒼山畫仙著金石攷瑯嬛仙館石畫記許仲弢廉訪藏有隸書三行屏四幀書年八十歲

張錦芳字粲夫號藥房一號花田廣東順德人乾隆己酉翰林工寫梅蘭書法右軍何伯瑜處士藏有墨梅大幀題七律二首識語四行足稱三絕

羅聘字遜夫號兩峰一號花之僧江蘇江都人金農弟子工人物梅竹山水尤擅鬼趣圖著朱草詩林香葉草堂集與李方膺李鱣金農黃慎鄭燮高翔汪士慎為揚州八怪就地論畫間有僑寓者家西園主人藏有設色秋夜禮佛圖立幀寫以造像法李梅卿比部藏有竹林達摩濯足

圖大橫幅沈峻如指揮藏有為曾賓谷中丞畫設色草橋圖小卷法式善張問陶等題甚夥陳葆珊觀察藏有梅花大幀以花青赭石烘地硃標染花石綠點苔焦墨皴枝幹有古興趣陳希祖陳希曾李宗瀚吳嵩梁曾燠萬上遴曹德華魯垂紳皆一時江右人題詠景劍泉閣學藏有大畫卷計長二丈四寸高一尺四寸開首畫墨梅一段又設色山水一段鍾馗一段粉黛髑髏一段洗馬圖一段楷書冬心畫馬題跋一段墨醑醮一段硃竹一段赭石一段雙鈎蘭花一段設色垂釣圖一段墨菊花一段行楷書款七行興至所為真奇絕也何子璋明府藏其曾祖蘭士先生款設色竹深荷淨圖便面意極蒼渾張樵楚尚書藏有布袋和尚大幀款署卻塵居士余藏有設色鬼趣圖大幀寫以園林樓閣具各種奇鬼鍾馗土地樓上乃夫嬾對坐而食几上羅列肴饌園中僕從往還將為鬼祟幸得鍾馗土地古神解護神情變幻景物淒涼令觀者瑟

縮蓋傷富室零落時也小楷七古長篇於左是雖筆墨奇逸似難張諸壁間子允續字練堂號小峰紹其業心泉上人藏有設色豆棚閒話圖立幀陳詩庭孝廉藏有設色蔬菜果品卷畫田家風致張子和比部藏有設色山水冊八葉筆意亦恪守家風

吳履字竹虛號瓦山野老一號公之宅浙江秀水人工山水花卉篆刻著苦茶庵集與奚岡黃易稱浙西三妙沈峻如指揮藏有為曾賓谷中丞畫賞雨茅屋圖小卷王芑孫張問陶等題詠甚夥陳詩庭孝廉藏有墨花木長卷雅似毘陵心泉上人藏有墨山水花木竹蘭冊八葉行楷題識又仿姚雲東墨山水立幀

瑛寶姓拜都氏字問庵號夢禪滿洲正白旗人永貴子廕生官筆帖式以病足不仕工山水人物花鳥兼長指墨書逼劉文清鐫刻師何雪漁曩遊西山適魁華峰尚書王蓮西太常疏修泉河水道約宿碧雲寺體乾

長老藏有絹本種松書屋圖大幀以余見稱遂為貽贈長老夙有古玉癖因解腰間子辰佩投報王信甫比部藏有設色菱花乳鴨圖立幀英和題五律一首

錢樹字寶庭號梅籟浙江仁和人官滄州運同研究畫理日沉膠山絹海間著西陲紀遊草洪張伯給諫藏有設色梅花石筍立幀詩字俱雅秀族弟杜原名榆字叔美一字叔枚號已居士松壺小隱山水法停雲花卉宗甌香著畫贅畫憶志伯愚閣學藏有摹古山水小冊允推精絕東字東皋號袖海一號玉魚生畫筆相似朱少松明府藏有杜東合作設色山水花卉冊杜作山水東題詩東寫花卉杜署款東子燕詒字幼魚官廣東從化知縣古肆見有設色仿燕文貴武夷疊嶂圖大幀鮑廷博字以文號淥飲安徽歙縣人欽賜舉人工書藏書最富刻知不足齋叢書廿八集詠物詩選許仲弢廉訪藏有行楷立幀書舊作七律二

首年八十五歲用筆圓潤

錢楷字宗範號裴山浙江嘉興人乾隆己酉會元官安徽巡撫工隸書山水著綠天書舍存草陳詩庭孝廉藏有五行隸書大幀筆意蘊萃諸碑欲於隸體中另立一幟

伊秉綬字組似號默庵一號墨卿福建甯化人乾隆己酉進士官江蘇揚州知府書法李西涯尤工古隸為當代能手著留春堂詩集曾筮巢侍御藏有和張船山驛柳詩行書卷款署花溪老伯命和韶州舟次呈稿趙搗叔明府藏有三行隸書大屏六幀張堯農水部藏有紙本大屏隸書兩幀行書兩幀款署茶山云云家西園主人藏有小行書冊八葉意擬誠懸極圈轉之妙又隸書四行大幀時款一行款署蓮波觀察子念曾字少沂號梅石官浙江處州同知工篆隸鐫刻兼寫山水梅花楊少初太守藏有墨梅大幀隸書七絕二首行書時款一行

黎簡字未裁一字簡民號二樵晚號狂簡廣東順德人乾隆己酉拔貢生書宗二王山水師仲圭袁子文上舍藏有墨山水大幀仿梅道人黃秋史比部藏有臨蘭亭字卷弟子何琛字海門香山人工畫何伯瑜處士藏有墨山水卷筆老意足亦梅道人法

蘇廷煜字虛谷安徽蒙城人乾隆己酉拔貢生官巢縣教諭書法眉山工指墨宛大山明府藏有夜景墨竹大幀款署特達

王元勳字湘洲浙江山陰人工士女得周仲朗法周蒼生太史藏有採桑士女立幀不施脂粉更饒嫵媚短牆一角與坡陀相接夕陽一抹流水迴環髻影衣香歷歷在目張朗山太常藏有摹李易安小照立幀用筆古秀又二喬觀書圖小幀亦極雅逸

石韞玉字琢如一字執如號琢堂一號竹堂晚號獨學老人江蘇長洲人乾隆庚戌狀元官山東按察使工隸書攷證擅古文心泉上人藏有隸

書橫作年八十三歲

洪亮吉原名禮吉字穉存號又喆江蘇陽湖人乾隆庚戌探花授編修以言事遣戍伊犁釋歸自號更生居士篆法李陽冰兼隸書工詩詞文著附喆軒卷菴閣更生齋等集輯北江詩話韓芸孫署正藏其祖芸昉中丞款五行篆書大幀余藏有先曾祖自東公款行書錄舊作詞八闕橫幅又篆書友于堂匾額

將祥墀字盈階號丹林湖北天門人乾隆庚戌翰林官吏部尚書書法歐虞公文孫鶴莊觀察藏有大楷幽風詩冊曾聞擬以上石近歲未知藏事否

黃鉞字左田安徽當塗人乾隆庚戌進士官戶部尚書諡勤敏山水取法蕭雲從兼寫蘭卉家西園主人藏有墨筆紫陽待渡圖小卷氣韻蒼秀堪與董富陽並駕曾筮巢侍御藏其尊人賓谷中丞款仿石谷鳳阿山

房圖絹本大幀精工嚴整設色清麗

汪梅鼎字澣雲號映琴江蘇海陽人乾隆庚戌翰林官御史工詩畫通琴理蔡之定推重之謂其無師承自得元人神髓余藏有設色柳溪秋思圖短幀時款癸酉冬仲戲寫

邢澍字雨民號佺山甘肅階州人乾隆庚戌進士官江西南安知府精攷碑版著全秦藝文志兩漢希姓錄金石文字辨異守雅堂詩文集與孫星衍同輯寰宇訪碑錄家西園主人藏有小行楷詩牋四幅合卷

熊方受字介茲號夢庵廣西永康人乾隆庚戌進士官山東兗沂道書法歐董擅用濃墨著偶園詩草古肆見有行楷牋紙冊

桂馥字冬卉號未谷晚號老沔一號讀井復民山東曲阜人乾隆庚戌進士官雲南永年知縣工隸書精攷碑版著說文義證札樸晚學集繆篆分韻張仰山處士藏有四行隸書大屏六幀款署季述老祖臺心泉上

人藏有臨孔宙碑六行大幀款署運生又傳其善畫宗倪黃工於點苔所作甚罕

張問陶字樂祖又字仲冶號船山一號芻冠仙史寶蓮亭主羣仙之不欲昇天者晚號藥菴退守鵬翮曾孫四川遂寧人乾隆庚戌翰林官山東萊州知府書法晉人略兼北魏工山水人物花木尤善寫猿鳥校定抱樸子著船山詩集余藏有行書兩冊一前半皆律詩後半書萊州府試擬作試帖白蘭厓給諫舊物一皆守萊州七律絕詩末書詠柳七絕集中未載款署壬申春日虎邱書寄芝田仁兄又移居七律詩立幀乃官吏部時書又花箋行書七絕大幀時款戊辰二月午莊又行書七律詩便面雙鈎墨蘭便面款署愛軒又石坡睡猿便面款署梧門又春寒七律便面韓芸孫署正藏有墨山水便面氣韻獨絕行書小跋一段心泉上人藏有桃樹白猿直幀昔寓松筠庵壽慧珠長老作曾筌巢侍御藏

有墨鈎瘦馬立幀行書七絕一首為其尊人賓谷中丞款古肆見有神
仙采芝圖絹本立幀行書七絕二首款署春塘仁兄與予皆蓬瀛舊侶
回首三神山當同有餘慕也呵呵又墨筆菊花立幀行書七絕時款甲
子秋日花下戲墨

張寶字仙槎江蘇上元人工山水作泛槎圖勒石李伯雨戎部藏有設色
金焦圖立幀筆意近梅道人

金學蓮字子青號手山江蘇吳縣人附生書法華亭著三李堂詩集吳子
復太守藏有行楷詩牋二十餘通合冊

程元多字直齋江蘇如皋人官浙江批驗大使工行草劉樹君觀察藏有
臨書譜全文冊頗入化境

唐英字俊公一字雋公號叔子晚號寄蝸老人漢軍鑲黃旗人官內務府
郎中權使淮粵九江工詩書畫主管窯事器製絕精超越前代有唐窯

之目著陶人心語唐竹汀筆政藏有行楷詩冊二十葉意近山谷竹汀
即其後人也

張道渥字水屋一字紫封號竹畦山西浮山人官雲南蔚州知州工山水
張問陶稱為逸品楊少初太守藏有墨山水小冊乾細雅潔張穆跋識
何子璋明府藏有設色山水便面款署蘭士

徐椿字寶齡號竹塘徐溶子工臨古蹟古肆見有墨筆仿房山便面從弟
梅字曉村畫入逸品所謂遊戲神通古肆見有餞春圖便面白筍朱櫻
青梅紫蕙簇簇如生

知掄達字蘭坡號鐵蘭道人江蘇常熟人工山水墨蘭著虞山畫志白雪
山房集心泉上人藏有墨蘭石立幀有林下風蓋精於鑑賞者落筆便
有奇致與俗工迥別焉

吳寶書字松厓號籀仙江蘇無錫人王文治弟子工詩駢體文善寫花果

尤精士女改琦極推重之晚年好寫墨梅文竹文石得意作鈐有作千秋想印章古肆見有綠竹墨石便面

邵士燮字友園號范村又號桑棗園丁安徽蕪湖人諸生嗜古工隸山水師邵瓜疇景劍泉閣學藏有五行隸書大幀又仿惠崇江南春圖立幀弟士鈐字用耕號東田山水宗司農杭芷舸明府藏有仿大癡設色秋山圖立幀弟士愷字犀南號鐵君乾隆庚戌進士官福建政和知縣山水多荒寒蕭瑟景王金珊農部藏有寒林遠岫圖立幀弟士昆字劍門號吾山工山水嘗獨行林莽間枯坐竟日范中立所謂師造化者獨其畫未獲觀焉

宋光寶字藕塘江蘇長洲人僑寓嶺南工沒骨花鳥古肆見有絹本設色花鳥屏八幀標新領異花鳥多不識名欲於宋院體中另創一派張樵楚少司農藏有設色花鳥屏四幀俱寫意作

王惟馨字荃心安徽歙縣人工山水王竹吾中翰藏有摹各家山水冊款署嘉慶癸亥長夏摹古十二幀寄塵蘭士先生何子璋明府藏有與其曾祖蘭士太守合作山水小冊儼如一手

宋霖字六雨江蘇通州人廩貢生官淮南訓導山水花卉皆有奇致鐵保極重之高懿伯戎部藏有墨花卉冊頗近徐天池

徐岡字立山一字評山號九成浙江錢唐人工花鳥余藏有設色嬰武粟子菊花立石直幀陳鶴舟明府藏有桃樹松鼠直幀王信甫比部藏有海燕蟠桃大幀皆似新羅書款亦類之

李世則字思若號味霞一號語石江蘇昭文人精醫善琴曲工山水校定松絃館琴譜楊守華明府藏有設色擬關仝山水大卷

朱冕字老匏江蘇揚州人工詩翰與蔡嘉高翔汪士慎高鳳翰時稱五君子古肆見有行草詩冊十葉多與蔡嘉奮和之作

蔡嘉字松原號朱方老民江蘇丹陽人山水花木與奚岡齊名楊少初太守藏有絹本攜琴訪鶴圖大幀精微研麗頗似耕煙張朗山大理藏有設色仿文待詔虎邱千頃雲圖大幀

朱文嶸字峻三又字峻山號西巖江蘇武進人乾隆辛亥舉人官興化訓導工山水心泉上人藏有設色山寺晚鐘圖大幀得墨井法子昂之字青立號津里紹其法余藏有仿一峰設色湖山致爽圖長卷輪廓峻嶒又仿唐子畏大龍湫圖卷為晚年作過形荒率又青綠山水直幀極臻古法

翟大坤字子屋號雲屏晚號無聞子浙江嘉善人工山水著歸硯草堂集家芝階太守藏有風雨歸舟圖大幀得渾淪氣象家西園主人藏有仿方壺墨筆小卷境益蒼莽子繼昌字念祖號琴峰一號墨癯紹其傳花木取法孫克宏受徒甚衆時稱翟派家西園主人藏有設色雜卉長卷

有古豔趣玉朵園觀察藏有設色仿文五峰山水小卷無款識有印章張熊跋後

姜燠字曉泉號鴛鴦亭長一號紅茵館主人江蘇華亭人鐵保幕客工寫士女著洗紅軒詩陳詩庭孝廉藏有士女大橫幅寫吳梅村詞句陳鶴舟明府藏有鴛湖打槳圖士女立幀士女坐舟中著紅衫極明淨岸邊楊柳生動欲活

萬承紀字廉山江西南城人乾隆壬子副貢生官南河同知書畫宗南宮詩學劍川屠倬極重之曾筮巢侍御藏有墨筆江山一覽圖大卷得巨師之氣暈觚稜轉折饒實力量曾觀其墓志稱其畫學米顛蓋撰文家非通曉畫理者也

洪承祖字靈士號林士一號紫霞山人安徽歙縣人工花卉在白陽南田之間別存蹊徑吳定甫刺史藏有設色花卉卷幽逸之氣撲人眉宇鈕

叔聞駕部藏有設色花木小冊意極疎雅

吳修字子思號思亭一號筠奴又號筠哥浙江海鹽人工寫生精鑑定收藏刻名人尺牘帖江海連珠帖青霞館帖著吉祥居稿余藏有設色博古花卉大幀名款書於瓶腹內文人雅製也

趙魏字晉齋號恪生浙江仁和人歲貢生工篆隸精攷證博收金石著竹菴庵金石目錄趙梅菴明府藏有篆書四行短屏六幀極古穆趣

儀克中字墨農山西平陽人工書畫攷證與修粵東省志楊少初太守藏有設色山水立幀渾厚近廉州古肆見有墨梅立幀

馬振字岡千號雲鶴陝西長安人畢沅幕客縱臨其所藏工山水花木擅人物法仇唐後館成親王邸第曾在申江青樓中見有青綠山水立幀寫柳色春藏蘇小家句款署雲鶴散人畫於京口旅次蓋當日亦為青樓中所作也

趙秉冲字謙士江蘇上海人文哲子欽賜舉人官戶部侍郎以諸生入懋勤殿侍直工真草篆隸梅蘭竹菊屢邀宸賞杜梅舫直刺藏有墨松大幀仁廟題七絕一首杜文正公受田賜本也余家藏有白貢牋隸書四行大屏四幀

蔣仁字山堂號吉羅居士女牀山民浙江仁和人性孤潔工篆隸鐫刻寫山水有幽逸趣陳詩庭孝廉藏有摹造像直幀行書長跋共印章七方書畫皆具金石氣

英和 賜姓石字煦齋號樹琴滿洲正白旗人乾隆癸丑翰林官大學士書宗承旨摹刻清華齋趙帖余家藏有 先祖松巖公款行楷牋屏四幀臨松雪梅花十絕中年秀潤筆也

李宗瀚字北溟一字公博號春湖江西臨川人乾隆癸丑翰林官禮部侍郎書宗右軍兼永興摹刻廟堂碑世稱李本精鑑藏有韋廬詩集余家

藏有小楷忠雅堂詩冊十八葉又寸楷宋廣平梅花賦卷又行楷錄舊作屏八幀為叔兄督糧江右時所獲

蔡之定字生甫號穀山又號鐵華居士浙江德清人乾隆癸丑翰林官侍講學士工篆隸古肆見有款署中堂鑑政真草隸篆屏四幀未審誰氏所遺此為最精余家藏有叔祖特夫公款大行書屏四幀蓋暮年入化境之作耳

陳希祖字敦一又字穉孫號玉香更號玉方江西新城人乾隆癸丑進士官鴻臚寺卿書法張樗寮兼思白著雲在軒稿周苻農少司農藏有寸楷臨八關齋全文冊余藏有行書忠雅堂錢唐觀潮詩大幀力透紙背秀高出紙款署梅溪六兄王竹吾中翰藏有小楷冊七葉專用思翁攝法書於嘉慶十九年款署黃山太守公祖同年即錄太守信州郡齋並增拓鵝湖書院五律詩陳昔凡刺史藏有小楷至聖七十代孫靜吾先

生墓誌銘冊六葉有昭薰敬藏印章子延恩字邃臣又字登之號雲乃官兩淮運判書法酷似從子孚恩字少默號子鶴又號紫藿道光乙酉拔貢生官吏部尚書殉新疆城難書宗思翁一變家法余家與其姻婭藏兩公書甚夥並舊藏書畫亦多所跋也

改琦字伯蘊一字白香號七薌又號玉壺山人以祖蒙召對賜姓改本西域人隸江蘇華亭籍工詩詞書法褚登善花卉多娟妙意士女極冷峭姿兼金粉白描時推巨手著玉壺山人集張詞甫刺史藏有墨花木冊葉有題識許樸齋太守藏有設色半身士女絹本短屏八幀又設色秋花大幀王芑孫題詠又白描壽者相直幀又日長添線圖大幀朱珠崖明經藏有李易安小影立幀姚椿題詠家西園主人藏有桃樹麻姑青鸞白虎絹本大幀純用金粉丁叔衡太史藏有補袞圖絹本直幀余藏有芝蘭雙玉圖直幀左書時款右題七古長篇又枇杷玉簪菖蒲立石

絹本大幀題款冬花映雪迎夏果垂金詩句

姚嗣懋字本仁一字修白號靈石山樵浙江錢唐人官直隸保定同知山水花木與奚岡頡頏陳鶴舟明府藏有與奚合作設色花卉大幀修白寫蜀葵一本鐵生補梳支萱花並書歲月自謂在白陽少谷之間古肆見有設色月季藤花直幀

莫晉字錫三號寶齋浙江會稽人乾隆乙卯榜眼官戶部侍郎書法海岳余藏家有叔祖特夫公款臨米禮部詩蹟大幀氣勢雄偉小跋四行蓋當日交誼甚篤焉

曹惠華字山甫秀先族子乾隆乙卯進士授中書工山水顧雲樵刺史藏有斷橋煙柳圖立幀極淡遠之妙余藏有仿李長蘅山水直幀趨嚮極高

黃丹書字廷受號虛舟廣東順德人乾隆乙卯舉人官教諭工書兼山水

竹蘭黃秋史比部藏有節臨化度寺卷

洪範字石農安徽休甯人官山東兗沂道工山水蘭竹許醴泉齋尹藏有絹本設色山水冊款署摹古十二幀於任城官舍略似耕煙李梅卿比部藏有風篁煙篠大幀金學蓮題七絕二首

黃易字大易號秋盦一號小松樹穀子官山東運河同知工篆隸鐫刻山水摹造像攷證碑版與嘉定錢大興翁陽湖孫青浦王為金石五家著小蓬萊詩鈔程覃叔副憲藏有五行隸書大幀家鐵梅中丞藏有四行隸書短屏六幀張仰山處士藏有墨山水立幀惜墨如金氣韻獨絕孫松門上舍藏有行書詩牋冊九葉墨筆竹石一葉造像碑塏樹石一葉費昶懷太史藏有嵩洛訪碑圖冊二十四葉冊高一尺寬倍之畫僅半幅設色墨筆不一如開元寺等慈寺白馬寺緱山卬山香山石闕石淙老君洞高陽書院小石山房太行秋色等圖篆隸題名行楷書款孫星

行篆書題首翁方綱王念孫洪範何琪並自題伊秉綬羅聘趙懷玉方楷金學蓮董士錫觀款總跋云嘉慶元年九月自開封至嵩洛十月經懷慶衛輝東還往返四十日得碑四百餘種遊履所經者成此二十五圖以誌快幸後有各家跋識四葉

王諤字一士號菊莊江蘇青浦人工寫竹精攷證著今話偶錄張仰山處事藏有墨竹直幀風致嫵娟筆有餘妍

錢泳字梅溪號梅花溪主江蘇金匱人書法坡公工篆隸鐫刻摹勒縮本漢唐諸碑當時名帖多出其手鐫著梅花溪詩鈔玉竹吾中翰藏有臨蘇札冊古肆見有臨乙瑛碑全文冊功力深而蘊藉少乃鐫刻名家也惲澹源字哲長號鐵簫惲格族裔花鳥得皮相黃益如茂才藏有設色天中麗景圖大幀頗饒妍麗劉葆和上舍藏有墨筆藤花大橫幅行書七絕一首亦極雅趣

張百祿字傳山賜寧子官江西安豐巡檢工花鳥出自家傳黃益如茂才藏有墨柳大幀生峭飛動的是天池遺風心泉上人藏有設色海棠白燕大幀周荇農少司農藏有百世封侯圖大幀署款摹丹邱生法子震字春鸞亦工畫鄂菊潭學士藏有設色松柏同春圖大幀筆意雄壯頗得祖風

江聲字叔澐一字鯨濤號艮庭江蘇元和人精說文工書善尺牘著尚書集注音疏經史子準繩論語瑛質恒星說晚年舉孝廉方正家西園主人藏有行楷尺牘一通歷曆數百言吳修跋識

畢紹棠字也香直隸天津人官雲南甯州知州山水法司農鈕韻笙太史藏有仿思翁墨山水大幀渾厚天成逼真能手

顧洛字禹門號西梅浙江錢塘人工花卉精士女著茸紫庵筆記周蒼生太史藏有題橋圖大幀鈕韻笙太史藏有散花天女圖立幀朱少松明

府藏有士女立幀款署寫斜倚薰籠坐到明詩句意濃態遠如親見其
夢入巫山時也增芝田觀察藏有弄璋叶吉圖大幀着硬色而不滯宛
大山明府藏有望月圖直幀牆頭花影濛籠寫出夜分景色子駒字渚
香傳其法汪登伯明府藏有梧桐士女直幀古肆見有采菊圖立幀亦
均雅秀

夏暈字羽谷號丕雉一號雲山野史江蘇吳縣人專工寫竹景劍泉閣學
藏有墨竹大屏四幀亦夏太常遺製也

徐堅字孝先一字友竹號規亭一號規園晚號澡雪老人江蘇吳縣人貢
生工篆隸山水著規亭詩鈔家西園主人藏有法董文敏仿北苑山水
大卷古肆見有墨山水大幀蒼厚皆近司農

秦儀字鳳岡號梧園江蘇無錫人工山水擅寫楊柳時稱秦楊柳曾笙巢
侍御藏有設色春柳大幀筆意綿密風致嫵媚又江千秋柳小卷葆瑛

女史隸書漁洋秋柳詩於後子寶字漫郎號朗軒紹其法心泉上人藏
有紅橋綠柳立幀亦善守家風

計楠字壽喬號隅老浙江秀水人方薰友歲貢生官吉安教諭工草蟲寫
梅時稱計紅梅著一隅草堂集古肆見有墨梅石立幀子芬原名煒字
擔石號小隅傳其法家藏三百名硯張振卿少司成藏有設色梅花蘭
石長幀亦從方氏法從子光炘字曦伯號二田同參畫理辦香石田南
田惜未獲觀焉

馬士圖字鞠村江蘇上元人工人物山水開畫社集一時名手著莫愁湖
志心泉上人藏有墨山水小幀寥寥有古致

胡桂字月香江蘇吳縣人山水得憚法精詞曲供奉清廷稱旨曰胡桂花
古肆見有摹石谷仿右丞山莊早春圖卷子九思字默軒紹其業曾笙
巢侍御藏其尊人賓谷中丞款西山紀遊圖絹本大卷兼文董法淡色

秀雅朱為弼題首吳清鵬吳嵩梁等並中丞自題於後

徐鉞字彥常號西潤浙江仁和人庠生工山水張子祥畫史藏有摹古山水小冊增芝田觀察藏有仿廉州松溪高隱圖大幀惜其名不遠揚以畫論較同時王學浩殆有過之

張鏐字紫貞號老薑一號井南居士江蘇江都人工篆隸通其法寫山水頗似清湘著井南老屋集家西園主人藏有與張騏合作設色山水冊各四葉鏐寫滿幅以蒼古合法騏畫半幅以精微入妙各以所長而致勝焉余藏有設色山水立幀直偏石濤又篆書晚香書屋橫額亦頗古拙

張騏字伯治號寶崖一號金粟山人蘼蕪山樵江蘇吳縣人山水人物花卉俱精微縝密張朗山太常藏有仿待詔桃源圖小卷屋宇橋梁農桑雞犬各得神肖又醮醮士女立幀極雅秀動人

徐世綱字鈍盦號鈍頭陀浙江秀水人黃易友工山水人物得老蓮法著通介堂集古肆見有採芝仙人立幀題五律一首

顧錦疇字約齋江蘇崑山人摹古入妙古肆見有仿耕煙設色山水立幀子春福字夢薌改琦弟子時稱入室李星甫署正藏有絹本寫韻圖大幀娟雅合古法湯雲松楷書七絕二首

陳鏞字序東號淥晴江蘇武進人畢涵弟子傳其法工摹淺絳孫松門上舍藏有仿淺絳山水大卷能見卷軸氣

王馥字香祖號學癡原禛曾孫王學浩弟子家風所在用筆清潤王竹吾中翰藏有絹本設色仿山樵大幀鬆秀可觀但布局未能深穩畫學難言哉

袁桐字琴甫號琴圃一號琴南又號琴居士袁枚族子官直隸河工通判工花卉小楷篆隸王雨三上舍藏有設色花卉冊雅韻欲流古篆題冊

首葉有楷書題識陳詩庭孝廉藏有仿南田園林景立幀並摹原題款
署菊岩云云

許敬字雪香浙江仁和人工寫梅直入冬心之室余藏有紅綠梅花長卷
密萼繁枝紙無餘隙款署左角仿冬心法時嘉慶戊辰十月十日作贈
尺魚四尺雅玩屠倬隸書冰雪聰明於首並行書小跋後有及三慶詩
跋查揆顧洛蔣炯前後觀款女史汪鯨雲題跋

陳倬字映之號無軒浙江歸安人官訓導博雅精鑑工山水著湘管齋寓
賞編其鑑定皆真確可據余藏有與宋芝山合作絹本淡着色山水立
幀細草文石極有逸趣各書姓氏歲月於上
郭麐字祥伯號頻迦又號白眉生一號蘧菴居士苧蘿長者江蘇吳縣人
書法山谷工篆刻詩詞著靈芬館集蘅夢樓詞鈔潘紱庭京卿藏有小
行楷詞冊十四葉舒秀遒陳夕帆刺史藏有行書七絕直幀款署曉

山玉竹吾中翰藏有江步青畫冬花盦主小像有其行楷詩跋一則族
弟驥字友三蔣敬弟子善寫老木荒溪之屬古肆見有墨筆樹石立幀
子岱字石君能寫人物惜未見也

蔣敬字敬之號芝生浙江仁和人郭麐互相師友工山水朱少松明府藏
有墨山水大幀景色蕭疎筆端夭矯汪登伯明府藏有墨山水立幀郭
麐題柳梢青一闋

黃知彰字貫芬號秋圃江蘇南匯人工山水好古精鑑著煙霞閣集百福
庵畫寄得龕存稿心泉上人藏有墨山水小卷小楷題云摹古須求
神似而在不着意處得之必可出人意表此幅欲擬巨師未免刻舟求
劍方信古人之不相及哉

汪大經字西村浙江秀水人歲貢生僑寓松江工書初法董文敏後師張
文敏著借秋山居集張子和比部藏有行楷錄舊作詩冊十葉直步天

瓶後塵矣又節臨西園雅集序直頓

李修易字乾齋號子健浙江海鹽人山水花卉俱合古法與妻徐氏合筆尤佳張仰山處士藏有設色秋葵石竹小立頓徐氏補墨蝶作飛狀左角署款某寫某補蝶

陳鍾豫字浚儀號秋堂浙江錢唐人工篆隸鐫刻善山水松竹梅曾於古肆見有墨筆松竹梅卷寫以篆法黃易隸書歲寒圖三字於卷首行書小跋四行寓目傾心議值未協妙畫可存何必論古今哉

邵聖藝字仲遊一字貢父號雲巢江蘇常熟人山水宗思翁心泉上人藏有墨筆仿一峰老人大卷作年七十二歲雅秀流溢絹素間仍是思翁一派也

蔣步瀛字三島江蘇吳縣人歲貢生工詩古文善書畫張子祥畫史藏有設色仿思翁摹北苑夏山圖卷古肆見有設色山水大冊各仿一家蔣

寶齡跋半葉乃其精製也

陳鼎字理齋安徽懷甯人官廣東香山縣丞畫宗廉州何伯瑜處士藏有墨山水大幀意極老健

周農字稻孫號七橋又號鐵瓢道人浙江烏程人工篆隸尤長寫梅許樸齋太守藏有墨梅大幀有古雋氣直逼冬心篆書雪林二字行書詩跋名款八行孫松門上舍藏有墨梅短卷款署擬王元章法行書七絕四首

陸愚卿字願吾號魯亭晚號息游江蘇太倉人秉庭訓精鑑賞收藏與畢瀧為一時之冠家西園主人藏有行書尺牘二通與子載論鐵筆篆法極為精確又傳其畫筆幽秀未見子因儀字素庵號小湖散人花卉學南田惜亦未見三代風雅太倉靈秀所鍾焉

王霖字春波江蘇上元人官福建淡水場大使成親王頗推許隸法曹全

碑精山水工花卉隨手寫意俱極生動瑛蘭坡中丞藏有淡著色芍藥便面足為白陽別派

余國觀字竹西號石癡順天宛平人官雲南蒙自知縣乞歸工竹蘭善行楷精鑑賞所居即朱竹垞故址仍以古藤書屋名其詩古肆見有墨蘭便面瑛蘭坡中丞藏有小行楷韓昌黎五古詩便面款署挺之

韋光霰字君繡號漣懷又號洞虛子江蘇長洲人工書秦瀛極推重之著在山堂集家西園主人藏有行楷岳陽樓記大卷

石渠字西谷浙江歸安人摹方薰大平歡樂圖有出藍之譽古肆見有寫吳梅村梧桐露冷暮吹簫白士女直幀

惲秉恬字潔士號梧岡江蘇武進人敦孝行嗜書畫精鑑藏工山水竹蘭晚年舉孝廉方正嵩犢山大司寇藏有墨山水立幀似仿倪雲林筆意雅潔

姚之麟字虎城號南溪浙江錢塘人阮元幕客畫師陳老蓮工書法善鑑金石余家藏有手搨彝鼎四種橫幅行書釋文於左右畫本未獲觀焉朱堅字石梅浙江山陰人工鑑賞畫梅創造錫壺砂裏精鐫刻堪繼諸家砂壺之美著壺史張仰山處士藏有墨梅立幀行書七絕一首書畫均雅

馮津字雲槎浙江桐鄉人官雲南劍川知州工書畫精鑑賞富收藏著論畫編畫家姓氏便覽家西園主人藏有論定九龍山人畫尺牘一通約百餘言牋紙長三尺許詞旨精確筆意舒秀兼趙董兩家

巖寅字介堂號同甫晚號菊隱山人江蘇長洲人工篆書善吟詠山水宗文沈兩家古肆見有墨筆仿石田溪山靜釣圖大幀頗得卷軸膏腴闕嵐字晴峰號文山安徽桐城人工人物花鳥尤善沒骨法譚頌甫刺史藏有設色人物大幀取法陳老蓮而筆意較工王輔臣少慰藏有沒骨

花卉絹本大冊神似馬扶義極為妍麗古肆見有進爵圖大幀亦老蓮一派

包世臣字誠伯號春伯晚號倦翁安徽涇縣人鄧石如弟子舉人工行草書有清朝書品分九等凡一百七人著安吳四種張仰山處士藏有小行書詩冊極有別趣景劍泉閣學藏有行草屏四幀用筆奇特非暮年豪放之作耳

錢元章字子新號拜石錢坵族子工篆隸山水得王學浩傳兼長花卉著書三味齋稿景劍泉閣學藏有篆書大幀又墨松竹大幀題款均雅秀

甌鉢羅室書畫過目攷卷三終

三韓震需厚魯典生校訂安宜劉義臣抄

通志